

DEN AMBIENTE....

Fotos y Texto: Jan Poets

MAYAN DIADOMINGO 4 JUNI DEN CAS DI CULTURA...

MINISTERIO DI HOBENNAN CATOLICO TA PRESENTA NAN OBRA "E TA BIBO"...

** Ministerio di Hobennan Catolico di Aruba (M.H.C.A.), bou di direccion spiritual di Pastoor Canuto "Toti" Fuentesbella, ta invita pueblo di Aruba en general y specialmente e hobennan cu nan famia, pa e obra en bibo di e "Pasion, Morto y Resurreccion di Cristo Hesus", combina cu un presentacion di e cancionnan di Ministerio di Alabansa y Adoracion (M.A.A.), cu lo ministra cu nan cancionnan di adoracion.

"The Passion of the Christ" Durante e conferencia di Youth Explosion 2004, nos a presenta un "play" cu a basa su mes riba e pelicula "The Passion of the Christ". E obra aki a wordo presenta pa hobenan di e comunidad di MHCA hunto cu algun miembro di Teatro Experimental Contemporario di Aruba, bou di direccion di nos ruman den Cristo, John Freddy Tobon Montoya.

E obra aki, pa honor y

Gloria di Dios, a hasi un impacto grandi riba tur esnan presente na Youth Explosion. Esaki tabata den un forma bibo y real, cu tabata dificil pa esnan presente, por a contene nan lagrima.

Riba peticion di e hobennan mes cu a presencia e obra aki y specialmente di nan famia cu a tende di dje, pero no por a mir'e, MHCA a ripiti e obra aki, durante temporada di cuaresma, dia 11 di Maart ultimo, caminda cu un sala completamente yen a biba cada momento di e obra aki.

Hopi ta esnan cu no por a wak e obra aki, pa motibo di otro compromisonan of pa motibo di por a haña ticket mas.

Kiko lo bo mira e anochi aki?

E anochi aki ta consisti di dos parti. E prome parti, ta e obra teatral cu ta cuminsa cu diferene esena. Lo tin e esena di e hobennan meti den e mundo di scuridad cu wega di Quijboard, despues lo tin un esena di e

famia cu no tin tempo pa otro, tambe tin un esena di hobennan cu ta ofrece nan mes na momentonan di passion y placer y finalmente lo tin e esena di e morto y Resurreccion di Cristo Hesus.

Na e parti aki lo bo mira Hesus na crus, e dolor di su mama y siguidornan y e momento cu nan ta pone Hesus den graf. Esaki ta un esena hopi tristo y conmovedor, pero e bon noticia ta cu Hesus a sufri y muri pa cumpra nos liber di nos picanan, pa asina nos por haña bida na abundancia. El a vense morto y reino di scuridad. El a resusita y "E TA BIBO".

E di dos parti di e anochi, despues di pauze, Ministerio di Alabansa y Adoracion lo presenta e cancionnan di nan ultimo CD, pa semper fiel y lo ministra cu nan cancionnan di adoracion na tur presente, pa asina trese nos den e ambiente di semana Santa cu cuminsa dia 20 di Maart 2005, den forma di concierto.

"Tur cos mi por, den Hesus cu ta dunami forza" - Filipensenan 4:13

Nos ta gradici Cristo Hesus nos Salbador, pa Su amor y talento cu e ta duna nos. E grupo talentonan pa Cristo ta hoben y hoben-adultonan cu a cuminsa durante e temporada di Youth Explosion 3 aña pasa y cu despues tambe ta presenta durante e diferente simannan di Seminario Bida den Spirito.

E hobennan aki a duna nan mes completamente na Cristo, pa asina nan ta instrumentonan pa otro hobennan.

Cu e guia di e professional di teatro, nos ruman den Cristo, John Freddy Montoya hunto cu miembronan di su grupo Teatro Experimental Contemporario di Aruba, nos lo tin un bunita presentacion, pa honor y Gloria di Dios.

Cumpra bo karchi na tempo, pa bo no keda afor. Nos ta anima tur hende pa cumpra nan ticket na tempo,

paso esaki ta un solo presentacion. Pues wak pa bo no keda afor. Tene bon cuenta cu e presentacion aki ta specialmente pa personanan hoben y adulto. Durante e esenan tin parti hopi profundo cu lo ta dificil pa muchanan bow di 11 aña compronde.

Ticket ta costa Awg. 20,= en general y ta obtenibel na: Botica Sta. Ana na Noord, Sleep Comfort na Sabana Blanco, Botica Maria na Santa Cruz, Dowco Cura Cabai, St. Therese Bible Book & Gift Store, miembronan di MHCA y MAA y si resta na porta. Pues nos ta warda bo, diadomingo 5 di Juni 2005, pa 7:30 p.m., bini Cas di Cultura, pa experiencia e Dios bibo, e Dios di milager, e Dios di poder, e Dios di Victoria, paso Hesus ta bibo y e ta para banda di bo y ta bati tur dia na porta di bo curason. Ta keda na bo, pa habri e porta y invit'e paden y biba pa semper cerca bo.

Dios Bendiciona boso ricamente!...

